

Yesu azali nani? Motuna oyo ezali kaka te oyo ezali kobulunganisa bato mingi lelo oyo, kasi ezali mpe motuna oyo etungisaki bato mingi banda kala, banda bileko mpe bileko. Ata ntango Yesu Kristo azalaki awa na mokili, mokolo moko atunaki bayekoli na ye motuna ya ndenge wana.

Matayo 16:13-15

“Ntango Yesu akómaki na bitúká ya Kaisaria-Filipi, atunaki bayekoli na ye: ‘Bato balobaka ete Mwana ya Moto azali nani?’

Bango bazongisaki: ‘Basusu balobaka Yoane Mobatisi, basusu Eliya, basusu Yeremia to moko ya basakoli.’

Alobaki na bango: ‘Bongo bino bolobi ngai nazali nani?’”

Okoki komona ete ata lelo, soki azalaki awa, alingaki kotuna biso mpe motuna yango: Biso tomoni ye lokola nani?

Bato bakozongisa ndenge na bango:

- Basusu bakoloba azali motindami ya Nzambe
- Basusu bakoloba azali mosakoli
- Basusu bakoloba azali mokonzi

- Basusu bakoloba azali Mobikisi
- Basusu bakoloba azali Nzambe ye moko...

Kasi, yango elingi koloba ete bato nyonso bazali na solo mobimba? Te. Bakoki kozala na solo na ndambo, kasi te ndenge Nzambe alingi bato bayeba Yesu.

Ezali lokola soki bato mingi batεlemi liboso ya mokonzi moko:

- Moko akoki kobenga ye tata
- Mosusu moninga
- Mosusu ndeko
- Mosusu mokambi

Moto nyonso akobenga ye na ndenge ya boyokani na ye. Kasi yango nyonso ezali te ndenge oyo mokonzi alingi bato bayeba ye.

Ndenge moko mpe mpo na Yesu:

- Bato mosusu bayebi ye lokola motindami → ezali solo
- Basusu lokola mosakoli → ezali solo
- Basusu lokola mokonzi → ezali solo
- Basusu lokola Nzambe oyo akómaki moto → ezali solo

Kasi motuna ya ntina ezali: Nzambe alingi tóyeba Yesu lokola

nani?

Tótanga lisusu:

Matayo 16:16-18

“Simona Petro azongisaki: ‘Yo ozali KRISTO, Mwana ya Nzambe ya bomoi.’

Yesu azongiselaki ye: ‘Esengo epai na yo, Simona Bar-Yona; mpo ete nzoto mpe makila te nde emonisi yo yango, kasi Tata na ngai oyo azali na likoló.

Mpe ngai nalobi na yo ete yo ozali Petro, mpe na likoló ya libanga oyo nakotonga Lingomba na ngai; mpe bikuke ya lifelo ekolonga yango te.’”

Awa tokoki komona ete emoniseli oyo Petro azwaki — koyeba Yesu lokola KRISTO, Mwana ya Nzambe — yango nde ezalaki ya ntina mingi. Na emoniseli yango nde Yesu atongaki Lingomba na ye, mpe lifelo ekolonga yango te.

Yango wana, tosengeli te komitungisa mingi mpo na koluka koyeba Yesu na makambo nyonso, mpo tokoki kosilisa ye te. Biblia epesi biso nzela ya pete:

☐ Tóyeba ye lokola KRISTO

Liloba “Kristo” elingi koloba Moto oyo apakolami mafuta, elingi koloba Mobikisi oyo Nzambe aponaki mpo na kosikola bato.

Soki oyebi Yesu lokola Mobikisi:

- Ozwaki fungola ya makambo nyonso
- Oyebi ete azali nzela ya kokende epai ya Nzambe
- Moto moko te akoki kokóma epai ya Nzambe kozanga ye

Yango wana, soki batuni yo lelo: Yesu azali nani?

☐ Zongisa: Azali KRISTO, Mobikisi ya mokili.

Moto nyonso oyo akoyamba ye na ndenge wana mpe akopesa ye bomoi na ye, ayeba ete:

- Satana akolonga ye te
- Tike ya kokende na likoló ezali na maboko na ye

Nzambe apambola yo.

Share on:
WhatsApp